

南開大學中國社會史研究中心資料叢刊

近代農業調查資料

12

鳳凰出版社

南開大學中國社會史研究中心資料叢刊

近代農業調查資料

12



鳳凰出版社

第十二册

蒙古西北墾務調查彙冊

西北墾務調查局 編

宣統二年

.....

蒙古西北墾務調查彙冊

西北墾務調查局 編

宣統二年

古 蒙

西北墾務調查彙冊

(全)

總論西墾

查前大臣辦理蒙旗墾務共分東西兩墾而西墾之地則分兩盟曰伊克昭盟曰烏蘭察布盟伊盟有七旗曰杭錦曰達拉特曰郡王曰札薩克曰準噶爾曰鄂托克曰烏審烏盟有六旗曰四子郡王曰達爾漢曰茂明安曰烏拉特前旗曰烏拉特中旗曰烏拉特後旗兩盟十三旗除伊盟之烏審蒙漢交抗至今未開烏盟之四子郡王尚未大放外餘均一律開放已放竣者則伊盟之郡王札薩克鄂托克烏盟之達爾漢茂明安旗也已放而未竣者則伊盟之杭錦準噶爾烏盟之前中後三旗也惟伊盟之達拉特旗則地屬永租不與放墾之列焉溯西盟開辦之初原議從烏盟之烏拉三公旗入手嗣因烏盟六旗聯盟抵拒而伊盟之杭錦達拉特則先後遣派蒙員來城商議準噶爾郡

王札薩鄂托烏審等旗亦先後遣使蒞止或報永租或請放墾於是前之擬從烏盟入手者一變而專注於伊盟矣厥後伊盟各旗陸續開放烏盟仍堅不報墾嗣由查辦蒙古事宜王大臣和碩肅親王嚴札催責並派道員陸鍾岱來綏襄辦該一盟六旗始於光緒三十二年聯銜呈報地段聽候開墾自是烏伊兩盟墾務始一律就議竊查西盟墾務辦理有難于東墾者地質遜於東而能放地畝又較東墾為少一也地方遼濶地段零落設局多而靡費鉅二也離口過遠地多遊民放地不易領地不多三也給蒙銀數於東為鉅四也地不多而地質又次則押荒之所入者少設局多用費鉅則押荒之耗虧者多然此但西墾各旗之旱地之虧墊也放墾旱地一經放竣撤局即無庸續之虧墊其虧耗尚在一時而西墾之絕大漏卮歷年虧耗至今靡

有底止者則水地之渠工是也蓋西墾之地以水地為勝水地者杭錦達拉特烏拉特前中旗也地居河套在狼山之南黃河之北本黃河之故道比年黃河南徙涸出河底遂淤積成地淤泥質肥而具膠性遇水則融化滋長無水遂堅成石田此套地之所以有渠工也計自二十九年起到三十四年四月十一日止杭達烏渠工共計用款伍拾肆萬叁千餘兩除本係修渠專款外計虧墊公款肆拾陸萬餘兩之多此西墾水地之虧耗也盡西墾之入以治西墾之事出入尚屬不敷甚鉅乃查貽前大臣先則以偽繳押荒而為公司盡壟斷杭錦旗地杭錦旗者伊盟之精華也更以杭旗所冒得之地價偽繳烏拉特押荒以盡佔烏拉特三旗地畝烏拉特者又烏盟之膏腴也甚至準噶爾旗僅餘拾數頃稍腴之地亦必盡入之於公司而後快唯達拉

特旗則以永租地畝得以僅免西墾膏腴之區亦既盡為公司所冒領然前大臣為公司之心固未嘗已也乃飾詞朦奏

朝廷減少押荒以增公司售地之價其先則已藉災捏奏預為公司

吞匿三十年杭旗之渠地租

詳後杭旗渠地租表

並藉名渠利以西盟局

徵存公家之地租畝捐水租渠貨盈餘抵租溢利前後共計拾

萬兩悉歸之公司而上下朋分之詳公案夫前則以公家之款為

朋分之餘利繼則凡有西盟之膏腴地盡歸之公司然而公司

應繳之押荒則不特所繳多屬官款詳公案並未實行預為繳足

此語前公司總辦李道雲慶於辦理烏盟局時且有稟聲稱擬令公司實行預繳押荒等語且更為公司領

地而故減少押荒以便公司售地得價如杭地押荒墾局本定

三等上地每頃玖拾兩中地捌拾兩下地柒拾兩嗣因公司承

領之故又改減為捌拾柒拾陸拾三等公司領之悉以每頃柒

拾兩計也則是名爲按中則交價實而公司轉售則分五等上地

壹百兩上次地玖拾伍兩中地玖拾兩中次地捌拾伍兩下地

尚捌拾兩也烏拉特前旗之地公司以捌拾兩一項領之而公

司轉售則上至壹百貳拾兩而下至玖拾兩矣中旗之地公司

售價九等貳百兩也壹百伍拾兩也壹百貳拾兩也壹百兩也

捌拾伍拾肆拾叁拾貳拾兩也而墾局所定公司應繳押荒則

僅柒拾叁拾貳拾壹拾兩四等矣後旗之地公司轉放壹百兩

捌拾兩陸拾兩伍拾兩肆拾兩叁拾兩貳拾兩壹拾兩也而公

司應繳之押荒當時詳定以每頃叁拾兩承領貽前大臣批

示一若尚恐押荒過鉅公司獲利不豐者矣準局之押荒本定

五等其上上則每頃壹百貳拾兩貽前大臣業經批准是項地

畝墾局亦已放出並收有押荒而前大臣忽又批令公司承領

改減押荒一等上則收銀陸拾兩多餘之數且為公司之地價
矣西墾膏腴之地既盡歸公司而押荒又因之減少是墾局已
重受其虧然而公司之放地者仍墾局也收價者又仍墾局也
是則墾局匪特僅受押荒之暗削且又承經費之虧墊矣且使
修渠由官修渠得地之所收者亦歸官其或尚可量入為出不
致墊虧過鉅然公司承領杭地當時號稱肆千頃雖杭錦報地
方數百里膏腴之地遑止此數但後套之地全賴乎渠無渠即
不啻無地當時姚學鏡雖有稟稱約澆肆伍千頃然係約畧之
辭未必即有此數以歷年放地既招種之數計之可知其不然公司既偽繳押荒號
領肆千頃勢決不肯不放盡墾局即不能不為之修渠澆足肆
千頃地而烏拉之地又盡為公司所有其間多屬水地亦需渠
者也渠愈薄則地愈多斯公司之獲利彌厚祇計公司放地之

多固不計墾局修渠虧墊之鉅也是西墾之款又不啻間接而更虧墊於公司矣西墾之款一虧於公司之侵吞再暗虧於公司之威削更間接而虧墊於渠工墾局之虧愈甚公司之獲利愈豐剝公家之款以肥公司此貽大臣之處心積慮也然而事權不一則各不相謀記賞論功則效忠愈奮此墾局總辦姚學鏡之所以兼公司總辦也

西墾虧墊如此其鉅其可以稍藉彌補者則唯有杭錦烏拉特之地價而杭烏地畝均為公司估領其價固稱應歸公司者也然查公司所領各地有以侵漁公款偽繳押荒者有以偽繳押荒所領地畝收得之地價而轉以繳納押荒者且竟有並未繳納絲毫之押荒而徵收地價者公司所領之地固或霸或冒之所得是則應行追還者也茲將公司冒霸地畝情形暨仍應追

歸墾局之理由說明於下

一公司冒領杭錦旗地之應追還墾局 查杭錦旗札薩克

貝子自革去盟長以後當將該旗東中兩巴噶報墾其初

本議照達旗辦法徵收承租嗣又呈請改徵押荒當經前

大臣奏定押荒等則上地玖拾兩中地捌拾兩下地柒拾

兩光緒三十一年夏五月與杭旗議定令其呈請以杭旗

肆千頃交公司承領分給押荒

公司副總辦呂革收繼純有五月間將杭地定妥即

須付銀等語覆條存局且當時該旗貝子曾有呈稱面晤大臣領金玉之教頓開茅塞棍布回旗凡事問知感激之

至本旗肆千頃押荒歸旗之處已呈稟矣等語遂于是月二十四日復又奏陳請

減押荒其摺畧謂此次赴套與該旗貝子商酌始知押荒

歲租有宜加以變通者宜另徵稟租而減歲租訪諸輿論

亦請加稟租而輕歲租擬請不論上中下每畝收稟租肆

分伍釐歲租減為上地每畝貳分貳釐中地壹分捌釐下地壹分肆釐其押荒數目亦即遞減上地每頃捌拾兩中地柒拾兩下地陸拾兩等語六月遂飭公司以每頃柒拾兩承領杭錦地肆千頃名為悉照中則勻計也公司承領以後前大臣為出示諭則上地壹百兩上次地玖拾伍兩中地玖拾兩中次地捌拾伍兩下地捌拾兩矣查杭錦報地而必議令呈請飭交公司承領者其意何居請減歲租而約畧混帶改減押荒者其意又何居蓋不令呈交公司則公司無從染指不改減押荒則公司獲利不多原定章程上地押荒每頃玖拾兩中地捌拾兩下地柒拾兩公司領地無論如何必不能悉以下則勻算也若悉以中地勻計則又恐公司獲利不豐也故假增渠租減歲租為名而

約畧混帶遞減押荒然後公司可以名為以中則領地而暗繳下地之價否則加增渠租改減歲租足矣與押荒何與其後公司地價每頃收至壹百兩人猶是領也渠租猶是徵也豈墾局每頃玖拾兩而轉無人過問必須減改者乎地歸公司公司應繳押荒矣八月十一日貽前大臣札公司包局文開公司領杭錦報墾之地肆千頃業由墾局文明撥交按照押荒定章以上中下三則勻算每頃繳銀柒拾兩計共應徵銀貳拾捌萬兩除提貳成渠費伍萬陸千兩其餘貳拾貳萬肆千兩應以一半歸蒙計銀拾壹萬貳千兩查此項銀兩本應俟公司繳到墾局再由墾局照章撥給現查該公司承領之地尚未發放其股銀又佔用於渠工各項一時艱於騰挪未能將應繳荒價全數繳納